

dez hilf vnz, o Maria, himlisshe ierarchia!
 Maria der werde nam dir, vrouw, gezimt vñ gezam,
 der ist von vñf puhstaben di sulch bedeutung haben:
 279 der erst ist mediatrix, dar nach auxiliatrix,
 der drit ist reparatrix, der vierd illuminatrix,
 der lezt heisset adiutrix; der erst bedeut ein sunerin,
 der ander ein helferin, der drit widermacherin,
 der vird ein erlevtherin, alz der ander ist gesetzt
 289 sulch bedeutung hat der lezt vnd bedeutet helferin
 oder ein widerpringerin.
 Maria, du himelz vrouw, du vil rosenreiche ouw,
 sunerin pist du uñr war sind got dein rain leip gear
 zwisshen dem mensshen vnd im . . erhor vnd vernim
 vnz deine erh kint¹ von Sion . . daz swer ioch von Babilon
 300 druchzet vnz ze ser nider, sün vnz mit deinem sun wider
 daz er laz den zorn sein . . . wir verdient haben pein
 mit mancherlei sunde groz, vnd mach vnz ledich vnd loz
 von der sweren sunde ioch daz wir entrin ach vnd och!
 72^a . . .
 dein . . . dein hilf ist manchem erchant,
 309 niht Theofilo alain dem du helferinne rain
 hulfez von grozer schulde, sunder du hilfst vm hulde
 allen di dich rufen an, di mach dein hilf nicht verlan .
 seind wir nu sein enmitten geuangen in Egypten,
 so hilf vnz ouz der vanchnús mancher hand sünde güssh
 319 zu Jherusalem der stat, do di heilig trinitat
 wont in der magen kerfte (!) stul, dez hilf vnz aller tugnt
 shul!
 Maria, der weisheit gloz, nach got dir niem ist genoz
 widermacherin du pist, wersloz dez pruchz den ein lange
 vrist
 der menshe led von der ceit daz es von des teuvlez neit
 329 vnz di ewig vreude prach, von einem pis daz geshach
 der vnz daz pardeiz pesloz, wir liden gemainen stoz
 ouz dem paradis her vur; dez selben pfort vñ sein tur
 haz du gemachet offen . alle di zu dir hoffen
 di enlezt du nicht hie vor, du wider machst im daz tor²

¹ 297 ? erbkind ? éhtkind.

² 337 l. in.